

- vnd daz gesehen nyman kan.
 von nichte schüff er auch den man.
 deme selben gap er vrien müt
 zû tünne waz en duchte güt. 70
 er sazte en in daz paradys,
 do verbot er eme eyn rys
 vnd waz sin wücher were
 daz er daz verbere.
 do zûbrach er sin gebot. 75
 dar umbe verstiez in got,
 die heimliche er do gar verlos,
 von schülden er do kos
 irretum vil mannichûalt,
 von des tieûels gewalt 80
 er wart den sünden vndirtan.
 durch daz müste er den tot entphan.
 mit eme schüf der valant daz
 daz er gots vil gar vergaz
 mit hoffart ioch mit rüme 85
 mit der apgot irretüme.
 (D) o begünde sich erbarmen
 got vbir vns vil armen
 der vns da geschaffen hat.
 339^a daz waz sines vater rat. 90
 dez waz allez volleist
 der vil heilige geist.
 er wart geborn aleine
 von einer magde reine
 Maria waz si genant. 95
 marterhaft wart er zühant,
 der marterhaft eine wart:
 er qwam an des todes vart
 der nie todes künde
 gewan an alle sünde 100
 er erstünt an deme dritten tage
 lebendich von deme grabe.
 des todes würden wir da bloz.
 vnser ere wart da vil groz.